



詩歌三首

【網望】

娘(niû)仔暝日大
娘仔食無歇
褪殼摧心肝
吐絲拚氣力
做hê縛家己

蜘蛛tîn-tōng幌
毋驚風來透
毋驚雨來沃
毋驚鳥來害
Kenn絲為將來

望啊望 等啊等
娘仔轉大人
生落好後代

望啊望 等啊等
蜘蛛食飽飽
毋免lin-lōng惹

艱苦頭 快活尾
為著好將來
拍拚有希望

【我欲按怎做】

細漢的時陣
學校欲開母姐會
我攏講：阿母無閒
因為驚伊庄跤倣烏白喋
削我面底皮

大漢的時陣
Tshūa母仔去惹街
干焦佇路邊擔仔抑是夜市仔
因為驚伊gâu thâi價ònn-ònn嚷
削我面底皮

結婚了後，發覺
育囡仔侍候大(ta)家
款待小姑細叔仔
儉錢買厝
人情世事逐項會
才知 i-iò是萬事通 博士博
陪伴伊開講
是我心靈的靠岸
到今 陰陽兩隔
心中 有千言萬語
心內 有滿腹苦楚
I-iò 我欲按怎做

【你是我的最愛】

為著你三頓
為著你將來
風雨也著淋
日頭也著曝
食苦當做食補

拍拚閣拍拚
酸鹹苦泔
歡喜做 甘願受
淡薄仔小成就
做夢也會笑

台灣 台灣
你 是我的最愛

創作理念

釘根佇生活

台語詩生活化，釘根佇本土；用阿母的話，上會當表達咱心中的感受。詩人用文學技巧，轉化、擬人、聯想、創作出動人的篇章。我嘛試看覓，【網望】是同音詞的聯想，ù動物講起拍拚是應該的、甘苦是當然的。

【我欲按怎做】是查某人ù細漢到大人、結婚後，對阿母的看法：笑伊sông到真佩服的心理歷程。【你是我的最愛】ù育囡仔予我靈感，愛囡兒、愛家庭、愛土地、愛台灣，攞是全款道理。

陳素經

彰化縣田中國小教師

